

ELINOLO LYA PAULUSI KU MALOMA OKULIMUKISA

Ebuka no Maloma kama ina kuñoliwa mwendi kwa mutumiwa Paulusi enako na kunyima mukaci no myaka makumi atanu ni ilimo inee ni makumi atanu ni ilimo itanu ni yaatu (54-58) munyima no kuleiwa kwa Jesu Kilesite. Paulusi yo kasipotela kale ku Loma sebeli otuma eliñolo eli, oku taluseta alapeli eyi no kutenda mu Loma, onje Amajuda nawo kaasa Majuda. Kame ana kuñola eli liñolo oku tundelesa mu Kolinte oko ana kwikalanga ba nako eyo. Paulusi na kuñola nji cwale etinaha mu litunga lyonje atwese oku lumela ni ku kuteka Jesu Kilesite (16.26.)

Ebuka no Maloma ni buka eyo ikwite out-okwa onene kwaa sikulapela konje-konje mane ni mu nako yonje mulibaka omo iyupahalela nomo Paulusi atolokela wino-wino oku yoyisiwa satuwane mwa Jesu Kilesite. Paulusi kame ana kuwaneka eliywi no kuwaba lya Jesu Kilesite ku Testamente no kale. Asi ku kwiyeta no kupula kame akanana nji ekauhanyo noutokwa onene mubuka eyi ni (1.16) eyo yaamba nji, “Senisiwa mulibaka no eliywi no kuwaba, kakuli ni maata a Nyambe ba ku yoyisiwa kwaa alumela onje. Ow-eli ku Majuda, cwale kwaa no macaba.” Ekalulo no matatekelo no Maloma (1-11) ni yao asi ku kwiyeta mane ni kalulo no wili (12-15) kama ikwite eyi no kutenda eyino titaelo no kupula ku kuyoya kwao asi kulapela.

Emitwi no yambo

Paulusi kame atateka eliñolo lyaye abo mu ukulimukisa yonyene mane ni kwamba kwa woyo ana liñolele. (1.1-15)

Aka no wiili kama añola eyi no mwikalelo no munu mane ni kutwesahala no ku yoyisiwa mwa Jesu Kilesite (1.16-11; 36).

Munyima nweyi, Paulusi sebeli oba etitaelo no kutenda no kupula ku kuyoya no asiku lapela. (13.1-15; 13).

Kame amana eliñolo no Maloma mukuba etitumeliso no kupula kwaanu mu keleke na ku Loma (16).

¹ Mene Paulusi, omubika wa Jesu Kilesite ona isaniwa oku tendiwa omutumwa nji aambe eliywi no kuwaba lya Nyambe.

² Eliywi no kuwaba ana kusepisa kale Nyambe mwanuhi aye mu mañolo no kukena.

³ Eliywi no kuwaba okukumanena kwa mwanaye, ona kuleiwa mu lusika lwa Dabida mu lutu no unu,

⁴ cwale naku monahalisiwa ni maata nji Mwanaa Nyanbe luli okukumanena ku mebo no kukena aba ana kwingulwa kwaafu, Jesu Kilesite Ombumu wetu.

⁵ Mwayonyene Jesu, Nyambe na kutuba esishemo no kutendiwa omutumiwa nji mulitina lyaye tu monise ano macaba etuso no ku kuteka.

⁶ Cwale okwekeza naanyi munaisaniwa kwa Nyambe nji mwikale kwa Jesu Kilesite.

⁷ Kwaanyi moonje aasikupumena muli mu Loma anyi musingiwa ni kwiisaniwa kwa Nyambe nji mutende esicaba saye.

Mubiwe esishemo ni kozo kwa Nyambe Sitetu ni kwa Mbumu Jesu Kilesite.

Etapelo no Kuba esi no Kutumela

⁸ Kame ni tateka oukutumela kwa Nyambe wange mwa Jesu Kilesite mulibaka lyenu moonje, kakuli etumelo yenu kame yambiwa mu litunga lyonje.

⁹ Kakuli Nyambe ni paki wange woyo ni belekela ni mebo yange mu liywi no kuwaba lya Mwanaye nji ni lesele oku mipuluka,

¹⁰ enako yonje abani lapela, kame ni kumbela nji mukusinga kwaye Nyambe alukise einu yonje nji ni lukisetwe omusipili no kuwaba aba niya kwaanyi.

¹¹ Kakuli kame nilakaza onene oku mimona, nji ni mibe empo imweya no mebo no kukena nji ni shukelwa

¹² abo cwale kame tufanena oukususuweza toonje omunjili ku munjili mu tumelo yetu.

¹³ Anyi abange kame ni singa nji mulimuke, etinako no kupula kame ni singanga okwiiya mu ku mi mona kono kameni kwangwanga, kakuli kame kwiya indina eyi ini kwangwisanga. Kame ni naasingi nji niye mu ku yangula etimbuto mwaanyi kanyi omo nina tendele kwa simacaba anjili.

¹⁴ Kakuli kame nili ni sikoloti ku Mageleke ni kwasi mishobo indina onje, bamweya kwasiku shangama naaelo.

¹⁵ Cwale kame ni shukelaoka kutaza eliywi no kuwaba lya Nyambe ni kwaanyi kame muyoya mu Loma.

Amaata no Liywi no Kuwaba

¹⁶ Kakuli seene oku kutaza eliywi no kuwaba lya Nyambe, kono ni maata a Nyambe no kuyoyisa onje awo asi ku pumena, oweli ku Majuda okubinda okuta ku Mangelike

¹⁷ Kakuli mwasonyene okuluka kwa Nyambe kame kuna shootolwa, oku tunda ku tumelo ni kuta ku tumelo kanyi omo ku ng'olelwe nji, "Woyo no kuluka, mbayoyo mu tumelo yaye."

Omubonda no Masika no aanu

¹⁸ Kakuli okutweba kwa Nyambe kame kutundelela kuwilu, mi okulwisa ouyi ni ufokoli onje no alume awo ana lyatelele eniti mutikezo too no kwiiba.

¹⁹ Kakuli eso sitwesahala oku limukiwa sa Nyambe kame sina hupulelwa kwa onyene, kakuli Nyambe naimonahaza kwa onyene.

²⁰ Kakuli oku tunda ku simuluhu no litunga eyi ya Nyambe no kwamoniwa, amaata aye ni Unyambe waye kame imonahala wino-wino mu inu yaye ana tende. Cwale abakulingeso kakwisa omo sakutatulele.

²¹ Kakuli simba nji kame alimukile Nyambe, kaasimukuteka kanyi yokame Nyambe simba okutumela kwa yonyene, kono kame ana futuka aa nambulwa tuso mu mihupulo yoo ni micima yoo eyi isaela oku yupisisa sebeli iilola.

²² Kame ana singi nji atende anoku shangama, cwale sebeli afutuka aaelo,

²³ ni kufutula ekanya ya Nyambe na kwaafa okwitenda amaswaniso no kuumba kanyi omunu, simba otuyunyi simba eiyamana, simba eyi yeenda ni mapumo.

²⁴ Cwalehe, Nyambe naaleselele okutenda eyino titakazo no micima yoo na kwakena, nji ashubule etinyutu too mukaci koo.

²⁵ Kakuli kame ana futula eniti ya Nyambe okwitenda amapwa ni kulapelela ni kusebeleza eyumbiwa okubita omuumbi, woyo olumbiwa enako yonje okuno kwabwa! Ameni

²⁶ Mulibaka eli, Nyambe naaleselele okutwalelela mu titakazo too atenda eyi no kwiiba. Mane akati sebeli alangana ni akoo akati.

²⁷ Mukutenda ngeso alume ni onyene sebeli alesela emikwa no kulangana naakati kono sebeli alangana nalume akoo.

²⁸ Kakuli kasi tokomela oku limuka Nyambe woyo no niti, Nyambe naabi ku minahano na kwanahana wino.

²⁹ Kame aiyalile eino kwiiba yonje mi kame ali ni matalu, ni lutimbo, mane kame ashukela eyi no akoo, ni muna nuukwibaa, ni tiñananyi ni tindwaa mane ni kooba

³⁰ asimapwa, aa atimbile Nyambe, asi kunye-fula, asi ku kuhumusa, asi kutateka eyi no kwiiba mi kakuteke ashemi oo.

³¹ Kaakwite etingana, kaasepahala, kaakwite elizwalo ni kuulwa amakeke.

³² Naaba alimukile ekatulo ya Nyambe eyi yaamba nji, Aanu onje ayoya ngeso, kame afa-nena okufa. Cwale kaitende fela, kono kame alumelela awo aitenda.

2

Ekatulo ya Nyambe

¹ Cwalehe weene omunu wakwite okulemena aakowe mi kame watula, kame okwatula wenyene. Kakuli wene watula kame otenda eyi atenda.

² Tulimukile nji ekatulo ya Nyambe niya niti kwao atenda eyi no kwiiba.

³ Cwale wene omunu feela aba watula akowe, kono ni wene otenda eyi atenda, kame onahana nji mbupicuka ekatulo ya Nyambe?

⁴ Kamba nji kame oshwaula esifumu no sishemo saye, nu ukukuteka kwaye, ni mucima waye no kuwaba kono kulemuha nji esishemo sa Nyambe kame sikutwala kukubaka?

⁵ Kono mulibaka no kwaayupa kowe ni mucima wowe no kwabaka kame okutewela okutweba muliywa lya Nyambe abo cwale ekatulo yaye no kuluka aba saimonahale.

⁶ Kakuli Nyambe kame sabe omunu ni munu omupuzo okukumanena kweyo atenda.

⁷ Kwao atwalelela okutenda wino einu, okame awo asaela okuyemiwa, ni kukutekiwa na kwaafa, asabiwe omoyo na kwaabwa.

⁸ Kono kwao aku tendela eyoo ni kukana eniti yaye ni kutenda ouyi, kame sa tambule okutweba ni kutina kwaye.

⁹ Kame sakwikale amayando ni kukola kwaanu onje awo atenda eyi no kwiiba, oweli ku Majuda ni ku Mangelike

¹⁰ Kono Nyambe mbabi ekanya ni tumbo ni kozo ku munu yonje woyo otenda wino, oweli ku Majuda okubinda ku Mangelike

¹¹ Kakuli kwa Nyambe kakwisa esaluluti.

¹² Awo onje ana tende esibi nambulwa mulawo

wa Mushe kame saatuliwe no mbulwa omulawo. Mi awo onje anatende esibi alimukile omulawo mbaatuliwa ku mulawo.

¹³ Abo kasa awo ayupa omulawo wa Mushe awo akenine balubala wa Nyambe, kono awo akokong'elela omulawo wa Mushe asa kayoy-isiwe.

¹⁴ Cwale asimacaba aba kaakwite omulawo kono alemine okutenda eso sisaeliwa ku mulawo wa Mushe, ni onyene ni mulawo kwaonyene, simba kwakwite omulawo.

¹⁵ Kame amonisanji eso omulawo wa Mushe osaela kame sing'olilwe ku micima yoo, abo emihupulo yoo kono elizwalo lyoo kame lyaapakela mi emihupulo yoo kame yaanyaza abanjili kame yaimanenanga.

¹⁶ Ba liywaa elyo, okukumanena ni liywi lyange no kuwaba, Nyambe kame saatule etikunutu no aanu mwa Jesu Kilesite.

Amajuda ni Mulao wa Mushe

¹⁷ Cwale weene wisaniwa nji uli Mujuda kame oku sepisa ba mulawo wa Mushe mi kame oku lumba mwa Nyambe,

¹⁸ ni kulimuka etato yaye ni kwekeza okutenda wino kakuli kame ona iyetiwa mu mulawo wa Mushe,

¹⁹ mi kame olimukile nji yawene otwaletele ei-bofu, eliseli kwawo ali mu uwi,

²⁰ tiwe omusiululi no aelo ni mwiyeti no awo ali mu uwi mu mulawo wa Mushe, kakuli kame okwite esisupo no kulimuka eniti.

²¹ Cwalehe, wene olemine okwiyeta akowe, ikene aba wasiku kwiyeta wenyene? Kame oku-

taza nji kakufanene okwiita, cwale ikene aba wi-ita?

²² Wene aba wamba nji kakufanene okutenda ouhule, cwale ikene aba utenda ouhule? Kame utimbile aafu no kuumba, cwale kame wiitanga mu tindoo no ku lapelela aafu

²³ Wene kame oku nuneka bakwikala ni mulawo wa Nyambe, kono kame oshwaula Nyambe mukucola omulawo waye!

²⁴ Kakuli kame ku ng'oliwa nji, “Elitina lya Nyambe kame linyefulwa mwa asimacaba mulibaka lyenu aendisi no Majuda.”

²⁵ Omupato wowe ni waniti nji kame okuteka omulawo, kono nji kame ocola omulawo, omupato wowe kautendile mupato luli.

²⁶ Cwalehe nji omunu no kwaingena mu mupato, kame ateula etitaelo no mulawo wa Mushe, kame kukufekile kanyi naingene mumu pato.

²⁷ Cwale woyo nakwaingena mu mupato kono kame amamela omulawo kame sami atule anyi muna ng'olelwe eyi no mulawo ni mupato kono kame mucola omulawo.

²⁸ Kakuli woyo na kwatenda Omujuda luli oli bandee, simba nji omupato no niti sinu sinjili sili bandee ni lutu

²⁹ Omujuda luli woyo mukaci, mi omupato luli ni wa mu mucima owo otendiwa ni mebo kasa feela. Okulumbiwa kwaye kakutundu kwaanu kono kwa Nyambe.

3

¹ Cwale ouwa ana wana aendisi no Majuda ubine? Simba etuso no mupato ibine?

² Onene ku maneku onje! Mu ku tateka, Nyambe na ku sepa omusebezi waye ni kubeeka amaywi aye ku Majuda oweli.

³ Cwale ngasibine nji anjili kakwite etumelo? Ninji okuulwa koo etumelo kame kutwesa oku shwaula etumelo ya Nyambe?

⁴ Kokuulwa! Kasangeso, mulesele Nyambe no niti simba nji aanu onje ni amapwa. Kanyi omo kuñolelwe mu mañolo nji,

“Kame ufanene oku monahala woyo no niti mu yambo wamba,
Nji ushowelele woyo nakukunungelela eyambo aba uzekisiwa.”

⁵ Kono cwale nji okufosa kwetu kame kumonahala okuluka kanyi kwa Nyambe, abohe iikene sa twaambe? Cwale mbatwamba nji Nyambe kame afosa aba alita okutweba kwaaci? (Kame naamba geso mu mukwa no unu.)

⁶ Kokuulwa! kakuli kambe Nyambe kasa waku-luka, kambe ngasibine saatwese okwatula elitunga?

⁷ Kono cwale nji okuulwa eniti kwange kame kutusa oku monisa wino eniti ya Nyambe, mane ni kwekeza ekanya yaye, iikene saniatulelwe kanyi osi ku tenda ouyi?

⁸ Cwale iikene aba twaatende eyi no kwiiba nji eyi no kuwaba iiye?” Kanyi aanu anjili aba aninyaza nji kame ni tenda ouyi! Oku nyaza koo na kuluku.

Kakwisa Woyo no Kuluka

⁹ Iikene cwale! Ninji aaci aendisi no Majuda kame tuli wino okubita ano Magelike? Kokulwa

kasangeso! Kakuli kame inaamba kale nji aendisi no Majuda ni Magelike kame ali mu maata no sibi.

¹⁰ Kanyi aba kuñolilwe nji,

Kakwisa omunu simba mumweya uyu no kuluka.

¹¹ Kakwisa uyu uyupisisa
simba uyu osaela Nyambe.

¹² Onje kame a yaukile, bamweya naafutuka aa no
kwiiba
mi naafoso
kakwisa uyu otenda esi nokuluka, simba
mumweya.

¹³ Emilyu yoo ni libita liyamine,
kameonga ni tindimi too, nimaywi nokwiiba
kanyi esifanu no sibili, aatunda mutunwa
too.

¹⁴ Mutunwa too kame kuiyalile etingangu, ni
ikuto no kulula.

¹⁵ Amakondo oo nakuleluba ba kwiita ounyinga.

¹⁶ Mutindila too kame kuli oku sinya ni
mayando.

¹⁷ Kaalimukile endila no kozo,

¹⁸ Mi mu miyo oo kaacili Nyambe.”

¹⁹ Cwale kame tulimukile wino nji eiyambiwa
mu mulawo yonje kame yambeliwa aayoya munji
no mulawo, nji otunwa tonje tondoke mi aanu
onje awaniwe ni mubonda balubala wa Nyambe.

²⁰ Kakuli kakwisa omunu somoniwa nji ni-
wakuluka mu miyo aye mu musebezi no mulawo,
kakuli omulawo kame otulimukisa esibi.

Omo tubeekelwe ouwa kwa Nyambe

²¹ Kono cwale okutundisako omulawo okuluka
kwa Nyambe naku limukisiwa, me upakiwa ku
mulawo ni unuhi.

²² Okuluka kwa Nyambe kame kutundelela tumelo mwa Jesu Kilesite kwao apumena onje, kakuli kakwisa efapahano mukaci koo.

²³ Kakuli onje kame ana tende esibi mi kame ana kauhelwe ku kanya ya Nyambe.

²⁴ Mi kame ana beekiwa fela ano kuluka mu sishemo saye kanyi omupuzo mu kuliululiwa kwa Jesu Kilesite.

²⁵ Woyo ona kubekiwa balubala kwa Nyambe okutenda esitabelo mulibaka no unyinga waye nji otambulwe mu tumelo. Esi kame sina kumonisa okuluka kwa Nyambe, naaba kasi kwaliketa ku ibi no kale.

²⁶ Neli oku monisa mu nako no balelo lino nji yonyene niwakuluka, ninji woyo oli ni tumelo mwa Jesu, Nyambe kame amubeeka ono kuluka.

²⁷ Cwalehe, ikene satukulumbe nayo? Kakwisa! Mulibaka libine? Mulibaka no musebezi? Koku-ulwa! Kono mulibaka no tumelo.

²⁸ Kakuli kame tukulwa nji omunu kame abeeekiwa ono kuluka mulibaka no tumelo kasa mu misebezi no mulawo.

²⁹ Cwale Nyambe, ni Nyambe no Majuda feela nji? Kasa nji ni Nyambe no macaba? Ee, ni Nyambe waa no macaba nonyene.

³⁰ Kaksuli Nyambe ni mumweya, mi aa ali ni mupato kame wabeeka ano kuluka mulibaka no tumelo yoo, nawo aulwile omupato ni mulibaka no tumelo yoo.

³¹ Cwale kame tucola omulawo mulibaka no tumelo? Kokulwa kasangeso, kono kame tongota omulawo.

Omwanda wa Abulahama

¹ Cwale iikene satwambe, Abulahama njekulyetu, siikene ana kuwana kuneku no unu?

² kakulinji Abulahama kame na beekiwa wa kuluka mulibaka no misebezi, abo, kame ali neso sakulumbe naso. Kono kasa balubala wa Nyambe.

³ Cwale eling'olo iikene lyamba? “Abulahama kame ana kupumena kwa Nyambe, mi okupumena kwaye, Nyambe kame amubalela nji wa kuluka.”

⁴ Cwale ku munu woyo otenda omusebezi, omupuzo waye kawaliketiwa nji ni mpo, kono ni tifo.

⁵ Cwale ku munu no kwa tenda omusebezi kono kame apumena fela kwa Nyambe, woyo oba aano kwiiba okubeekiwa ono kuluka, yonyene etumelo yaye kame ibaliwa nji kuluka.

⁶ Esi sokame Dabida esa aamba embuyoti no munu woyo waliketiwa kwa Nyambe nji ni wakuluka, oku ulwile emisebezi aba aamba nji,

⁷ “Kame ali ni mbuyoti awo ana lemenwa etifoso too,

Awo ana fukeliwa eibi yoo!

⁸ Embuyoti ni ya munu woyo uulwa okupulukelwa eibi yaye kwa Nyambe.

⁹ Embuyoti eyo kana kame ibiwa feela aa anati ku mupato, nji naa kasita ku mupato? kakuli kame twamba nji, “Abulahama naku pumena kwa Nyambe mi mu tumelo yaye, Nyambe naku mu pumena nji wa kuluka.”

¹⁰ Cwale ngasibine aba ana kubalelwa ngeso, yoli ngaibi? Abo yowa ingena kale mu mupato, nji

yokasi ingena kale? Neli abo yokasi ingena kale, kasa nji yowa ingena kale kokulwa.

¹¹ Sebeli ota ku mupato, neli esisupo no kumonisa nji wakuluka mu tumelo yaye anakwikala nayo yokasita kale ku mupato. Elibaka neli nji atende Sitoo onje kwawo apumena kwa Nyambe onje, nawo aulwile okuta ku mupato nji nonyene abalelwe etumelo nji nikuluka. mi kame a tambulwa kwa yonyene kakuli ni wa kuluka, simba nji kaa sita ku mupato.

¹² Kame osili Sitoo kwao a tambulwa kuta ku mupato, kasa kwao fela anati ku mupato, kono nawo aenda mu mwanda no tumelo ya Sitetu Abulahama yokasita kale ku mupato.

Esepiso ya Nyambe kame Itambulwa mu Tumelo

¹³ Esepiso ya Abulahama na ikulyaye noku yola elitunga, kayasikwiiya mu mulawo kono neli mukuluka no tumelo.

¹⁴ Cwale nji okuyola kame kuyoliwa ni mulawo, ulimuke nji etumelo ni sepeso kaikwite tuso.

¹⁵ Kakuli omulawo kame ulita okutweba, kono aba kuulwile omulawo kakutamba kwikala okucola omulawo.

¹⁶ Mulibaka no ngeso, esepiso kame ina kwiya mu tumelo, nji itende mu sishemo, nji yongotetwe mu lusika lwa Abulahama, kasa kwao fela asi mulawo kono ni kwao akwite etumelo ya Abulahama. Yo sitetu toonje,

¹⁷ kanyi omo ku ñolelwe nji, “Kame inaku tende Sitoo no matunga no kupula.” Mu miyo a Nyambe, mwayonyene apumena, woyo oba

omoyo kwaanokufa ni kwiisana einu nji kame iyoya eyo nokwayoya.

¹⁸ Abulahama sebeli opumena mukusepa, naba kuna kuulwa esepo, mi sebeli otenda ngeeso Sitoo nomacaba no kupula, kanyi omo kuna kwambelwa kwa yonyene nji, “Kanyi olusika lowe omo salwikalele.

¹⁹ Mi kakuli kasi kufokola mu tumelo, mane kasi kwaliketa nji olutu lwaye kame lukulubalile, kakuli emyaka yaye kame inakwana omwanda (100), ni kunahana nji moyo waye Sala katwese ku leya kame.

²⁰ Kakuli kakwisa esinu simba simweya sinaku mutongokisanga okukumanena ni sepiso ya Nyambe, kono sebeli okongota mu tumelo yaye muku lumbeka Nyambe.

²¹ Kame ana kolwa nji Nyambe mbatwese okutenda eso anaku musepisa.

²² Ababo etumelo yaye sebeli oibalelwa nji kuluka,

²³ kono amaywi anaku ng'olelwa kasa aye fela yomboci.

²⁴ Kono naaci ngeso kame sabalelwe ni kwaaci tu pumena kwa woyo ona kwingulwa kwaafu Jesu Ombumu wetu.

²⁵ Woyo ona kwibaiwa mulibaka no ibi yetu, ni kwingulwa nji tubekiwe ano kuluka.

5

Ouwa ni Nyambe

¹ Cwale aba tuna tendiwa anokuluka mu tumelo, kame tuli mu kozo ni Nyambe mulibaka Iya Mbumu wetu Jesu Kilesite.

² Mwa yonyene tunawana etumelo mu sishemo omo tuwaniwa, mi kame tuwabelelwa mu sepo no kanya ya Nyambe.

³ Cwale kasa ngeso fela, kono kame tuwabelelwa mu mayando etu, kakuli kame tulimukile nji amayando kame atulitela okongoteta,

⁴ Okutundamena kame kulita emikwa no kuwaba mi emikwa no kuwaba kame ilita esepo.

⁵ mi esepo kaitwenisa, kakuli elilato lya Nyambe nali kwitelwa mu micima yetu, mu mebo no kukena, eyo ina kubiwa kwaaci.

⁶ Kakuli abo metu sifokola, ba nako inakufanena Kilesite nakufela asikutenda ouyi.

⁷ Iikene aba kubambabile nji omuunu afele aa nokuluka, mwendi omunjili abasa kongote omucima okufela aano kuluka.

⁸ Kono Nyambe kame amonisa elilato lyaye kwaaci nji nabo tusilemine okutenda eibi, kakuli Kilesite nakutufela!

⁹ Cwalehe abo, aba tubeekilwe anokuluka ni unyinga waye, mbatu yoisiwa mwa yonyene ku kutweba kutunda kwa Nyambe.

¹⁰ Kakuli naba tusili eiila, kame tuusetwa kwa Nyambe muibaka no lufu lwa Mwanaye, aba tuna usetwa kwa yonyene, kame satu yoisiwe onene mulibaka no moyo waye!

¹¹ Kasangeso fela, kono tusi wabelelwa mwa Nyambe mulibaka lya Jesu Kilesite Ombumu wetu, kakuli aba tuna usiwa ngeso ni mulibaka lyaye.

Elifu mwa Adama Oupilo mwa Kilesite

¹² Mulibakaelyo esibi nasikwiiya mu litunga mulibaka no munu mumweya mi elifu ni

mulibaka no sibi, mu mukwanongeso elifu naliyi kwaanu onje kakuli kame anatende esibi onje.

¹³ Esibi luli kwasina kwikalanga oweeli mu litunga omulawo akawa sisumiwa kale, kono esibi kasi baliwa aba kuulwile omulawo.

¹⁴ Nabakulingeso elifu nali kubusa okutunda kwa Adama okutwala kwa Mushe, simba kwao ana kwatenda esibi kame liikalako noku matuka omulawo mu mukwa oku fekile kanyi anakutenda Adama,

Yonyene oli esifekiso sa woyo soiya.

¹⁵ Kono empo no sishemo kaikufekile kanyi esibi sa Andama. Kakuli aano kupula kame anafu mulibaka no munu mumweya, esishemo sa Nyambe ni mpo itunda mu sishemo no munu mumweya yonyene Jesu Kilesite yonyene kame ipulele aano kupula niku bitelela!

¹⁶ Mi empo kai kufekile kanyi esibi sina kwiya mulibaka no munu mumweya, kakuli ekatulo no munu mumweya kame ina liti ekatulo no kuba aanu no kupula omubonda, kono empo no sishemo kame inatundu ku tifoso no kupula mi kame ina bwele mu kututenda aa no kuluka!

¹⁷ Nji mulibaka no mubonda no munu mumweya elifu kame linabusu mulibaka lya woyo omunu mumweya, onene awo nambula esishemo mukupula kwaso, ni mpo no kutenda aa no kuluka, kame saabuse mu moyo mwa yonyene woyo mumweya Jesu Kilesite.

¹⁸ Cwalehe, kanyi omubonda no munu mumweya aba ona liti ekatulo eyi iba aanu no kupula omubonda, mu mukwanongeso, okuluka no munu mumweya kame kulitela aanu onje

okuluka oko kuba omoyo.

¹⁹ Mi kanyi aanu no kupula aba anabeekiwa asi kutenda esibi mulibka no kwaluka kwa munu mumweya, mu mukwanongeso mukuluka kwa munu mumweya aanu no kupula kame satendiwe aa no kuluka.

²⁰ Omulawo nawiyi nji etifoso tipule, kono oko okupula no esibi, esishemo sa Nyambe kame sipula onene ni kubitelela.

²¹ Nji cwale esibi aba sina busu ni puso no lifu, mu mukwanngeso esishemo sibuse oku tutenda aa no kuluka, ni puso no omoyo no kwaabwa, mwa Jesu Kilesite Ombumu wetu.

6

Elifu kame litunda ku Sibi kono Okuyoya kame kwiiya mwa Kilesite

¹ Cwale iikene satwambe? Cwale tusiekeza okuyoya mu sibi nji esishemo simonahale mukupula.

² Kokuulwa! Natukufa kulineku no sibi, cwale ngasibine satuyoye musibi?

³ Cwale kamulimukile nji aaci tonje tuna kolobezwa mwa Jesu Kilesite kame tuna kolobeziwa mu lifu lyaye?

⁴ Natu pumbekiwa cwale naye mu kolobezo no lifu, nji cwale abo Kilesite aba saingulwe kwaafu mu kanya ya Sitetu, naaci kame mba twende mu moyo no ubya.

⁵ Kakuli nji natu kuwana naye mukufa noku kufeka kanyi kwaye, mbatu kuwana naye mukwinguka kwaye.

⁶ Cwale tulimukile nji ounu wetu no kale kame una kwiibaiwa ni yonyene, nji cwale olutu no sibi lubwe nji tulese okutenda aabika no sibi kame.

⁷ Kakuli nji omunu nafu kame alukuluhile mu sibi.

⁸ Nji natufi ni Kilesite kame tupumena nji mbatwinguka ni yonyene kame.

⁹ Kakuli kame tulimukile nji Kilesite abana kwinguka kwaafu katamba kufa kame, mi elifu kali tamba okwikala ni maata kwa yonyene.

¹⁰ Elifu anafu kame anafu kamweya ku sibi sonje, kono omoyo a yoya, kame ayoyela kwa Nyambe.

¹¹ Yongeso ni kwaanyi, muhupule nji namukufa ku sibi, mi kame muyoye kwa Nyambe mwa Jesu Kilesite.

¹² Esibi silese okubusa mu tinyutu tenu nokufa, mulese okuteteta ku titakazo no sibi.

¹³ Kame mulese okuba esibi kwilama no lutu lweni nji itende kanyi eyitusiso no kutendisa eyi no kwiiba, kono mukubeeke kwa Nyambe kanyi awo ana tundisiwa ku lufu okuta mu upiplo, nikuba ekalulo no ilama yenu kwa Nyambe nji itende eitusiso no kuluka.

¹⁴ Kakuli esibi kasitamba oku tenda Ombumu wowe, kakuli kausamo munji no mulawo wa Mushe kono munji no sishemo.

Aabika no Kuluka

¹⁵ Iikene, cwale? Kana mbatutende esibi kakuli kame tuli munji no mulawo wa Mushe kono kakuli kame tuli munji no sishemo? Kakukonahala!

¹⁶ Cwale kamulimukile nji aba mukutenda aabika no munu oku muyupa, kame muli aabika

aye yonyene woyo muyupa, simba abika no sibi esi sitwala ku lifu, simba ku likute eli litwala ku kuluka.

¹⁷ Kono kame tukutumela kwa Nyambe simba nji kame tuli aabika no sibi kame muna kukuteka etuto eyo muna kubiwa.

¹⁸ Namu lukululwa ku sibi mi sebeli muli aabika kweyi no kuluka.

¹⁹ Kame naamba mu mukwa no ounu, mulibaka no kufokola mu ku yupisisa kwenu. Ba weeli namu kutenda aabika kweyi no kwiiba, oku yoya omoyo no kwiiba. Cwalehe mukutende aabika no kuluka nji mukenisiwe.

²⁰ Aba muna kwikalanga aabika no sibi, namu kulukuluha kweyi no kuluka.

²¹ Cwalehe omupuzo muna kuwanabo munako eyo ubine ku inu eyo imyenisa bano? Einu eyo kame imitwala ku lufu!

²² Kono cwale namukulukululwa kusibi, sebeli muli aabika a Nyambe, mi omupuzo munawana kame umitwale ku kukena, mi amamaneneno ni moyo na kwaabwa.

²³ Kakuli omupuzo no sibi nikufa, kono empo no sishemo sa Nyambe nikuyoya nokwabwa mulibaka lya Jesu Kilesite Ombumu weetu.

7

Omwanda no Likwala

¹ Abange kamulimukile, kakuli kame naamba kwaawo alimukile omulawo nji omulawo kame obusa omunu abo yosiyoya.

² Mulibakaelyo, omukati no ku kwala kame anungilwi kwa mbumwaye mulibaka no mulawo

yosiyoya, kono nji mbumwaye nafu, na lukululwa ku mulawo owo umununga kwa mbumwaye,

³ cwale kame saisanawe omubuki aba sakwale ku mulume mundina nji mbumwaye yosiyoya. kono nji mbumwaye nafu, na lukuluka ku mulawo owo, mi nji akwale ku mulume mundina kaisanwa nji mubuki.

⁴ Abange naanyi ngeso, namufu kulineku no mulawo mu lutu lwa Kilesite nji cwale mutende ano munjili, awoyo yonyene ona ingulwa kwaafu nji tubeekele Nyambe emiselo.

⁵ Kakuli abo tusiyoya mu nyama, etikezo tetu no kwiiba kame tina ku sebezanga mu ilama yetu, mi naiku litanga elifu.

⁶ Kono cwale, natu lukuluha ku mulawo, kakuli natufu ku onyene onakutu nunganga, nji tusebeleze Nyambe mu mukwa no ubya no mebo, kasa mu mukwa no kale no taku ina ng'oliwa.

Omulao wa Mushe ni sibi

⁷ Cwale iikene satwambe? nji omulawo ni sibi? Kokuulwa! Kono kwaulu omulawo kambe kanisi limuka esibi. Kwaulu omulawo waambe nji, “Olese oku lakaza,” kambe kanisi limuka oku lakaza.

⁸ Kono esibi nasiwana omukwa mi nasiingene mwa mene mukulaelwa, etitakazo tonje. Kakuli oko kuulwile omulawo, esibi nasifu.

⁹ Mene kame ina kuyoya okuulwile omulawo, kono etaelo aba ina kwiiya, esibi sebeli siinguka, mi mene sebeli nifa.

¹⁰ Etaelo inakuni sepisa omoyo, sebeli iwaniwa nji kame initwala ku lifu.

¹¹ Kakuli esibi nasiwana esibaka oku nionga mu taelo, mi sebeli nifa mwa yonyene eyo etaelo.

¹² Onyene omulawo niwakukena, niyonyene etaelo niyakukena, no kuluka, no kuwaaba.

¹³ Cwalehe, esinu no kuwaba nasiliti olufu kwa meme? Kokuulwa! neli esibi sina sebeze elifu kwa mene mu sinu esi no kuwaba nji simonahale nji ni sibi, nji mulibaka no taelo esibi nasi futuka esinu no kwiiba oku manenena onene luli.

Endwaa mukaci Ketu

¹⁴ Tulimukile nji omulawowa Mushe niwa mebo, kono mene kaniwa mebo, kame nina ulisiwa kanyu omubika no sibi.

¹⁵ Siyupisisa eso ni tenda, kakuli sitende eso ni saela, kono kame nitenda eso ni timbile.

¹⁶ Cwale nji ni tende eso ni ulwa okusinga, kame ni pumena nji omulawo niwa kuwaba.

¹⁷ Abo cwale kasa mene luli nitenda ngeeso, kono ni sibi eso sili mwa mene.

¹⁸ Kakuli kame nilimukile nji ouwa kausako mwa mene, mi mbili muunu feela, kakuli okusinga mwakuli mwa mene, kono sitwese okutenda ouwa.

¹⁹ Kakuli sitende ouwa ni singa, kono ouyi nitimbile wani twalelela oku tenda.

²⁰ Cwale nji kame nitenda eyo nitimbile, kasa mene otenda ngeeso, kono ni sibi eso sili mwa mene.

²¹ Cwale kame niwana nji aba nisinga okutenda esino kuwaba, ouyi wokame oli kwa mene.

²² Kame ni lakaza omulawo wa Nyambe mu munu woyo oli mukaci no mucima wange.

²³ Kono kameni mwine omulawo wa Mushe mundina mu ilama yange owo ukulwisa ni mulawo no ku yupisisa kwange, mi kame unitwala mu ubika no mulawo no sibi owo oli mu ilama yange.

²⁴ Mbili munu no umayi no ngasibine? anyine soni tundisa mu lutu luno lunitwa ku lifu?

²⁵ Kame niku tumela kwa Nyambe mwa Jesu Kilesite Ombumu wetu!

Cwale simba mene, kame ni sebeleza omulawo wa Nyambe muku yupisisa kwange, kono mu nyama kame ni sebeleza omulawo no sibi.

8

Oupilo mu mebo no kukena

¹ Kakwisa katulo cwale kwaa aikalile kwa Jesu Kilesite.

² Kakuli omulawo no mebo no omoyo ou uli kwa Jesu Kilesite kame unani liulula ku mulawo no sibi ni lifu.

³ Kakuli Nyambe natende eso sina kukwangwiwa ku mulawo wa Mushe, mulibaka no kufokola ku unu. Kame ana atula esibi muunu mu kutuma Mwanaye mulibaka no sibi, woyo ona kwiya mu unu kanyi omukwa wetu no sibi.

⁴ Nyambe nakutenda ngeeso nji esi silaelelwa mu mulawo wa Mushe siyatetetwe mwaaci aa aendisiwa ku Mebo kasa mumukwa noun.

⁵ Kakuli awo ayoya mu mukwa nounu kame atwala emihupulo yoo kweyi nounu, kono ao ayoya mu mebo kame atwala emihupulo yoo kweyi no mebo.

⁶ Kakuli awo ayoya mu mukwa nounu kame ku twala ku lifu, kono awo ayupa eyi no mebo kame ku twala ku omoyo ni kozo.

⁷ Kakuli awo ayupa eyi nounu kame atimbile Nyambe, kakuwana ni mulawo wa Nyambe, mane kaatwese luli.

⁸ Cwale awo aendisiwa muunu katwese oku wabelisa Nyambe.

⁹ Kono anyi kamufanene okuyoya muunu, kakuli kame muli mu mebo, mi luli Emebo ya Nyambe kame ili mwaanyi. Omunu yonje nji kakwite Emebo ya Kilesite kaasa waye.

¹⁰ Kono nji Kilesite kame ali mwaanyi, simba nji etinyutu tenu natifi mulibaka no sibi, Emebo yenu kame iyoya mulibaka no kuluka balubala wa Nyambe.

¹¹ Cwale Emebo ya woyo ona ingula Jesu kwaafu nji kame ili mwaanyi, yonyene woyo ona ingula Jesu Kilesite kwaafu mbabi omoyo ku tinyutu tenu eti tifa mu mebo yaye eyi iyakile mwaanyi.

¹² Cwalehe, abaange, kame tufanena okuyoya kanyi Emebo omo itu ambelela okuyoya, kono kasa okuyoya omo tusingela aaci.

¹³ Kakuli aba mu yoya mu ku koñelela etitakazo no lutu lweni, mba mufu, kono nji kame mwibaa emisebezi no lutu mulibaka no mebo, mba mu yoyo.

¹⁴ Kakuli onje awo aendisiwa ku mebo ya Nyambe, ao naana a Nyambe.

¹⁵ Abo kamwasi tambula Emebo eyo imiingenyeka mu ubika nji mucile, kono kame muna tambula Emebo imi tenda aana a Nyambe, kakuli

na mutambula Emebo eyi yang'ula, eyo mwa yonyene aba tulilaa nji, “Abba, Sitetu!”

¹⁶ Yo kame Emebo eyi ikupakela ni mebo yetu nji kame tuli aana a Nyambe.

¹⁷ Mi cwale nji kame tuli aana a Nyambe, mba tuli naaci esanda, tulye esanda sa Nyambe ni Kilesite nji kame tuyanda naye nji tuwane ekanya ni yonyene.

Ekanya Eyi Iiya

¹⁸ Kame ninahana nji amayando no ba nako ino kalukele okubapanywa ni kanya eyo saimonahale kwaaci.

¹⁹ Kakuli eyumbiwa yonje kame itatelele mu kushukela onene okushotolwa no aana a Nyambe.

²⁰ Kakuli eyo ina ku umbiwa, kame ina ku bekiwa mu puso eino mapwa, ka sa mu ku singa kwayo, kono mu kusinga kwa woyo ona kuibeekamo mu sepo,

²¹ nji eyumbiwa ni yonyene kame sailukululwe mu ubika no koola nji ibiwe etukuluho no kanya ya aana a Nyambe.

²² Kame tu limukile nji eyumbiwa yonje kame itonga bamweya naaci mi kame iyupa okukola no kuleya ni balelo lino.

²³ Mi kasa eyumbiwa fela, kono naaci, aa ali omuselo no weeli no mebo naaci kame tutonga me tu tatelele onene okutenda aana, mane ni kuliululwa ku tiyutu tetu.

²⁴ Kakuli mu sepo eyi natu yoyisiwa. Cwale esepo eyo imonahala cwale sebeli kasa sepo, kakuli anyine so sepa eyi amona?

²⁵ Kono aba tu sepa eyi twasimona, kame tu si tatelele onene mu kukoongota.

²⁶ Mu mukwanongeso Emebo no kukena kame itutusa mu kufokola kwetu, kakuli katuyii omo tufanena okulapelela, kono Emebo yonyene kame itu lapelela mu sitongo ni maywi ao ka twesiwa okutaluswa.

²⁷ Cwale yonyene woyo otatuba emicima no aanu, kame alimukile emihupulo no mebo kakuli Emebo kame ilemine oku lapelela aanu a Nyambe, okukumanena ni tato ya Nyambe.

²⁸ Kame tu limukile nji einu yonje kame ibelekisana bamweya okulita ouwa kwaawo asinga Nyambe, onyene awo ana isaniwa okwamana mu mulelo waye.

²⁹ Kakuli awo ana kuketa oweli, nakwataba kame okwatenda aa afekile kanyi Mwanaye, nji atende yokame omweeli kwaainaye no kupula.

³⁰ Cwale awo ana ku ketiwa, na kwaaisana, mi awo ana kwisaniwa nakwabeeka ano kuluka, mi awo abeekilwe okuluka, naabi ekanya yaye.

Elilato lya Nyambe mwa Jesu Kilesite

³¹ Cwale ikene sa twaambe kweeyi? Cwale nji Nyambe kame ali kwaaci, anyine sotu lwisa?

³² Yonyene woyo wasikukatwa mwanaye luli kono nakutubaye aaci toonje, cwale ngasibine satende, kana katamba okutuba einu yonje ni yonyene?

³³ Anyine so lita ekatulo okulwisa awo ana ketiwa kwa Nyambe? Yonyene Nyambe onaa tende aa sikuluka!

³⁴ Anyine, cwale so twesa okwaatula? Kasako, kakuli Jesu Kilesite ona kufa, eeni, mane naingulwa kwaafu, woyo oli ku lyoko no silyo lya Nyambe, mi kame a tu lapelela.

³⁵ Anyine so tu taba ku lilato lya Kilesite? Nji kame sa kutende amayando, simba oubamba, simba eng'alelwa, simba elishebo, simba okusheeba, simba ekozi, simba omukwale?

³⁶ Kanyi omo ku na ku ñolelwa mu mañolo nji, “Mulibaka lyowe kame twibaaaiwa eliywaa lyonje, kame twaliketwa kanyi omukoko ota mukwibaaaiwa.”

³⁷ Kokuulwa, mu inu eyo yonje kame tumatuka niku bitelela mwa yonyene woyo ona kutusinga!

³⁸ Kakuli kame ni kolwa nji simba elifu, simba omoyo, simba amangeloi, simba eyi ibusa, simba einu eyi iliko bano, simba einu eyo esiya, simba amaata,

³⁹ simba beulu, simba kunji, simba esinu sinjili mu yumbiwa yonje, sasitwese okututaba okutunda ku lilato lya Nyambe mwa Jesu Kilesite Ombumu wetu.

9

Nyambe naanu aye

¹ Kame naamba eniti mwa Kleste, mi soongo. Elizwalo lyange kame lini paka mu mebo no kukena,

² kame neenine onene, ni kukola nokwa pumula mu mucima wange

³ Kakuli kame ni singe nji, mene luli! ni kutiwe kwa Nyambe ni kutundisiwa kwa Kilesite musibaka no asimukowa wange.

⁴ Onyene luli a Maisilaele, mi okwang'ulwa ni koo, ni kanya, ni ulikani, ni kubiwa omulawo wa Mushe, ni sebelezo, ni ku sepisiwa,

⁵ onyene kame ali asi mukowa munene omo ina tundu emikowa yonje mane ni Kilesite mwana leiwa muunu, Nyambe woyo oli beulu no inu yonje, alumbekwe okuta oko nokwaabwa! Amen!

⁶ Kono kasa nji esepiso ya Nyambe naikwangwa, Kakuli kasa anu onje aa anatundu ku Isilaeli kame ali Amaisilaele.

⁷ Simba awo ali olusika lwa Abulahama, kasa ana a Nyambe onje, kono kame kunaambiwa nji, “Mboliteliwa olusika mwa Isaka aikulyowe.”

⁸ Esi kame sitalusa nji kasa aana mu nyama ao ali aana a Nyambe, kono aana a Isaka awo ninakusepisa okame aa aliketiwa nji olusika.

⁹ Kakuli esi sokame sinakwambiwa mu sepiiso nji, “Mu nako eyi ifanena kame sani uke, mi Sala kame saikale ni Mwana no mushimani.”

¹⁰ Mi kasa eyo feela, kono ni Lambeka ngeso aba anakwikala naana no ambuyu ku mulume mumweya yonyene sitetu Isaka.

¹¹ Abo aana no ambuyu akasi leiwa kale mi kaasi tenda ouwa simba ouyi, nji cwale omulelo wa Nyambe no kuketa utendahale,

¹² Lambeka nakwambeliwa kwa Nyambe nji, “Omukulu mba sebeleze omwanukana,”

¹³ Kanyi omo ku ñolelwe nji, “Kame nisinga Jakobo, kono kame nitimbile Esau.”

¹⁴ Cwale iikene eyo satwaambe? Kana Nyambe wa saluluti? Kokuulwa!

¹⁵ Kakuli na kwamba kwa Mushe nji, “Kame sanifele amakeke woyo sani fele amakeke, mi

kame sani shemube woyo sani shemube.”

¹⁶ Cwale kasa mulibaka lya eyo a saela omunu simba kweyo atenda, kono kame iimanine feela ba makeke a Nyambe.

¹⁷ Kakuli mu eling'olo Nyambe nakwambela Ombumu na mu Engepita nji, “Esi ninaku imekele ni mu libaka linene no kumonisa amaata ange mwa wene nji cwale elitina lyange lyambiwe mu litunga lyonje.”

¹⁸ Cwale abo, kame ashemuba woyo a singa mi kame atatafafelela woyo asinga.

Okutweba ni Makeke a Nyambe

¹⁹ Cwalehe kame so aambe kwa mene, “Ngasi-bine satunyaziwe kwa Nambe? Kakuli anyine so kana etato ya Nyambe?”

²⁰ Kono tiwe anyine wene omunu, aba okanana Nyambe? Kana esiumbiwa iikene sa saambe ku muumbi, “Iikene aba munani tende ngeesi?”

²¹ Kana omu umbi no tucoo kame akwite etukelo no ku ku tusisa elimaa omwa singila? Ba siñomoto si mweya no limaa kame twesa oku umbabo otucoo twiili, eijili nokuwaba einjili no kwakutekeha.

²² Cwalehe nji Nyambe asinge okumonisa okutweba kwaye ni kulimukisa amaata aye, kono sebeli otatelela ba nako no kuleba mane ni kuyanda kwao ana kwaliketa ni kutweba kwao ana kusinga oku sinya sinya.

²³ Nji Nyambe asinge oku monisa oufumu no kanya yaye mulibaka no makeke, aaci ana kulukisetwa ekanya ba weeli.

²⁴ Bokame abo ana kwisana ka sa ku Majuda feela kono ni kwa simacaba.

25 Kanyi eyo anaamba Nyambe mu buka ya Hosea, aba aamba nji,

“Awo ana kutenda nji kasa aanu ange,
mbanaisana ‘anange mi aanu nasiisana aanu
ange.’ mbaisaniwa aanu ange,
mbanaisana aasingiwa.’

26 Mi omo Nyambe ana kwamba nji, ‘anyi kamu
tendile esicaba sange,’
kame saisaniwe nji aana a Nyambe no kuy-
oya.”

27 Mi Isaya kame aamba kwaanu a Isilaele nji,
“Aanu no Isilaele simba aba sa ikale ano kupula
kanyi omushekesheke no ba likamba no liwate,
Mba ku yoyisiwa ano kwetekela feela

28 Kakuli Ombumu kame satende ekatulo
yaye anaamba mu litunga, aitende muwangu
okwimanenena.”

29 Mi kanyi Isaya aba anakwamba nji, “Kambe
Ombumu no timpi kasikutu siyela aana, kambe
kame tukufekile kanyi Sondoma ni Ngomola.”

Isilaele ni liywi no kuwaba

30 Cwale iikene sa twambe? Nji ano macaba
awo kaasiku singa okukong'a okuluka nawana,
okuluka kutunda mu tumelo,

31 Kono aanu no Isilaele awo ana kusuweza
omulawo wa Mushe no kuluka kasikuuwana.

32 Cwale mu libaka lya iikene? Kakuli ka si
kuutenda mu tumelo kono kame anakuutenda
mu misebezi no mulawo, kame ana sitatala ba
“liwee eli li sitatalisa”

33 Kanyi omo kung'olelwe nji,
“Kamu mone, kame ni beeka mu Sione eliwee elyo
saali sitatalise aanu,

eliwee elyo salyakwise.
Mi woyo yonje so pumena kwa yonyene katamba
okwenisiwa.”

10

¹ Aanyi akwange, esi nilakaza mu mucima wange mane ni tapelo yange kwa Nyambe ninji aanu ange akayoyisiwe!

² Kame naapaka nji, kame atukufalelwe eyi ya Nyambe kono kasa muku yupisisa.

³ Kakuli mukwalimuka okuluka kwa Nyambe, mane ni muku saela okuluka koo, kasiku kubeeka kunji no kuluka kwa Nyambe.

⁴ Kakuli Kleste bokame aba kubwela omulawo wa Mushe, nji omunu yonje woyo opumena amubeeke ono kuluka.

Okuyoisiwa ni Kwaanu Onje

⁵ Mushe nañolo eyi nji, “Omunu woyo okong'elela okuluka oko ku tunda ba mulawo mbayoyo nawo.”

⁶ Kono okuluka ku suminwe ba tumelo kame kwambiwa nji, “Olese okwamba mu mucima wowe nji, anyine so kambamena ku wilu?” (abo ni ku lita Kilesite banji).

⁷ Simba nji, “Anyine so shetumukela mu sibaka saano kufa?” (abo, ni kwingula Kilesite kwaafu).

⁸ Kono iikene esi sambiwa? “Eliyiwi kame lili beebi ni wene, ba kanwa kowe ni mu mucima wowe” (esi, ni liyiwi no tumelo elyo tukutaza)

⁹ Kakuli nji kame wamba ni kanwa kowe nji, Jesu ni Mbumu niku pumena mu mucima wowe nji Nyambe naku mwingula kwaafu, mbuyoisiwa.

10 Kakuli omunu kame apumena ni mucima waye nji abeekiwe uyu no kuluka, mi kame apaka ni kanwa nji ayoisiwe.

11 Amang'olo kame aamba nji, “Awo onje apumena kwa yonyene katamba kwenisiwa.”

12 Mihe ka kwaliketiwa nji kame kuli eshutano mukaci no Majuda ni Mangelike, kakuli Om-bumu no aanu onje ni mumweya, mi niwakufuma mwao aisana kwa yonyene onje.

13 Kanyi omu aambela amañolo nji, “Awo onje aisana ba litina lya Mbumu mbayoisiwa.”

14 Kono ngasibine sa isane kwa yonyene woyo kaasipumena? mi ngasibine sa lumele kwa yonyene woyo kasiyupa kale? mi ngasibine sa yupe eliywi oku ulwile osiku kutaza?

15 Mi ngasibine aanu abaka kutaza aka situ-miwa? kanyi omo kung'olelwe nji, “Ngasib-ine awabile amakondo aawo akutaza eliywi no kuwaba!”

16 Kono kasa onje ana kuteke eliywi no kuwaba. Kakuli Isaya naamba nji, “Mbumu, anyine ona pumene eyo ana yupu kwaaci?”

17 Cwalehe, etumelo kame itunda ba kuyupa, mi okuyupa kame kwiiya mu ku kutaziwa eyi ya Kilesite.

18 Kono nisi ibanguta, ninji kasiyupa? Koku-ulwa nayupu,

“Eliywi lyoo nalihasana mu litunga lyonje,
mi amaywi oo nakakeela ku mamananeno no
litunga.”

19 Kame niibanguta nji, Amaisilaele kaasiyupa?
Mushe yono tateka okutambula nji,

“Mbanikutusisa aano macaba nambulwa tuso
okumitenda asimuna, awo kalimukile
onyene mane

ni lusika no weelo kame sanimi twebise.”

²⁰ Mi Isaya sebeli okongota okwamba nji,

“Kame nina waniwa kwawo ana kuulwa oku
nisaela,

kame nina kumonahaza kwaawo ana kuulwa
okwiibanguta eyange.”

²¹ Kono aba aamba Isilaele nji, “Kame ina
olola amaoko ange eliywaa lyonje kwaanu no
kwaayupa mi naakana okupumena.”

11

Amakeke a Nyambe kwaanu a Isilaele

¹ Kame ni ibanguta, Nyambe na kana aanu aye?
Kokuulwa! kakuli mene luli kame nili mwiisi-
laele, no lusika lwa Abulahama, no mushobo wa
Benjamin.

² Nyambe kasi kana aanu aye awo ano kuketela
okutunda ku matatekelo. Kamulimukile eling'olo
omu lya mbela, omo Eliya omu ana kukumbelela
kwa Nyambe kweyi no Isilaele nji,

³ “Mbumu, kame anaibaa anuhi owe, kame
ana kwisi etialetale towe, mi time memboci nina
siyala, mi kame asaela omoyo wange.”

⁴ Kono siikene ana tambula Nyambe kwa
yonyene? Neli nji, “Kame nina kuteweke alume
noku kwana eikiti mutanu ni yiili (7;000) awo
kaasikubama amanwi kwa Baale.”

⁵ Mi ni mu nako ino kusili aa asi siyalele kwao
ana kete Nyambe mulibaka no sishemo saye.

⁶ Kono nji ni mulibaka no sishemo, abo kasa mu misebezi, kambe ni mu misebezi kambe esishemo kasa sishemo.

⁷ Abo cwale ni ngasibine? Eso ana kusaela Isilaele kasikusiwana. Anokuketiwa nakusiwana, kono anjili nakukwangwa.

⁸ Kanyi omo kung'olelwe nji, “Nyambe kame anakwaaba Emebo no mandingwe, ni miyo nokwaamona ni matwi no kwaayupa okulita ba liywaa na balelo lino.”

⁹ Ni Dabida kame aamba nji,
“Mulesele etafule yoo ifutuke elilaba ni katwa,
esisitataliso ni koto eyi yafanene!

¹⁰ Mulese amiyo oo ailole nji aulwe okumona,
mi emyongo yoo iobame okuta oku nokwaabwa.”

¹¹ Cwale kame niibanguta nji, cwale aba ana sitatala naakweelele nji? Kokuulwa! Kono okufosa koo, okuyoisiwa kame kuneyele aasimacaba, nji Amaisilaele abusiwe mukwaafela omuna.

¹² Cwale nji okufosa koo kame kuna litele elitunga esifumu, mi oku kwangwa koo kame kuna litele asimacaba esifumu, abo cwale babine sasikume esifumu soo!

Okuyoisiwa no Macaba

¹³ Cwale kame naamba kwaanyi asimacaba, mi kame ni tumisa omusebezi wange kakuli kame nili omutumiwa no macaba.

¹⁴ Kubita nji nitendele anjili aasimushobo wange omuna, kono ni yoyise anjili kwaaonyene

¹⁵ Kakuli nji okukaniwa koo kame kotalusa okuyisiwa no litunga, okutambulwa koo kame sakutaluse ibine? Kandi kasa kwanyi okwingula aafu!

¹⁶ Nji enkwilimba ina kutendiwa esitabelo kwa Nyambe baweli neli omuselo owu no kukena, ni mukoko wonje niwa kukena, mi cwale nji omubisi kame ukenine, ni mitai kame ikenine ngeso.

¹⁷ Kono nji emitai injili naicoko, cwale wene esitondo no olibe namunaheng'i, kame ona beekiwa mu sibaka saso okutabela oufumu no sitondo no olibe.

¹⁸ Abo olese okukuumuseta emitai eyo. Nji kame okukuumusa, ohupule nji kasa wene ona ongota omubisi, kono omubisi wokame owu ukongota.

¹⁹ Kame so wambe nji, "Emitai aba ina koko neli nji nibeekiwemo mu sibaka sayo."

²⁰ Eyo ni niti. Kame ina temiwa kakuli kaasiku pumena, mi wene nuimana mu tumelo yowe. Cwale okongote mi olese okukuumusa, kono ocile.

²¹ Cwale nji Nyambe nakuulwa okusileleza emitai luli no sitondo, ni wene katamba okufela amakeke.

²² Mulemuhe cwale esishemo sa Nyambe ni kutweba kwaye. Okutweba kwao anakwi, ni sishemo sa Nyambe kwawene, nji kame otundamena mu makeke aye nji kasangeso niwene mbutemiwa.

²³ Mi nonyene akowe aba kaatwalele mu kupumena koo, kame saa beekiwemo nonyene, kakuli Nyambe kame ali ni maata nokwaabeekamo kame.

²⁴ Kakuli nji wene ona patuliwa kweyo ili nji ya luli no sitondo no olibe, ni kubeekiwa mu mukwa nji kasa wa luli, mu sitondo no olibe silimilwe luli, cwale tunjinga saiusetwe okubeekiwa mo eyi emitai na mumushitu no itondo no olibe.

Amakeke a Nyambe baanu onje

²⁵ Abange, sisingi nji mushwekelwe eniti eyi, kame nisinga nji mulimuke einu no ku bambaba. Outata kame oneyi ba kalulo injili no Isilaele, okubitela epalo no asimacaba sonje aba saiye kwa Nyambe.

²⁶ Mi cwale Amaisilaele onje mbayoisiwa, kanyi omo kung'olelwe nji,

“Omuliululi kame satunde mu Sione
kame sa tundise eibi mu lusika lwa Jakobo.

²⁷ Mi ou wosotende oukwamanyinga wange nonyene

Abo sani tundise eibi yoo.”

²⁸ Mulibaka no ku kana eliywi no kuwaba aendisi no Majuda nafutuka eila ya Nyambe, mulibaka lyenu aanu no macaba. Kono okwaliketa omu ana kwaaketela Nyambe, nafutuka alikani aye mulibaka no ashemi oo no kale.

²⁹ Kakuli etimpo ni kwisana kwa Nyambe eyo kaifutuka.

³⁰ Kanyi aanyi omo muna kuulwela elikute kwa Nyambe, kono bano na muwana esishemo kakuli kame mukwite elikute.

³¹ Cwale kaasikukuteka kwa Nyambe nji amakeke ana monisiwa kwa wene nonyene nji atambule amakeke.

³² Kakuli Nyambe nanungu aanu onje no kuulwa elikute, nji aafele amakeke onje.

Etumbo kwa Nyambe

³³ Outungi no ufumu ni kushangama ni unangu wa Nyambe! Etikatulo taye kati twesahala okusaisisiwa, mane ni tindila taye kati twesahala okuwaniwa!

³⁴ Kanyi omu kuna kung'olelwe nji,
“Anyine woyo olimukile emihupulo no Mbumu?
Anyine woyo sotwesa okumweleza?”

³⁵ “Simba nji anyine woyo onabi Nyambe empo,
nji ausetwe esinjili?”

³⁶ Kakuli einu yonje kame itunda kwa Yonyene,
kame inaiyi mwa Yonyene, mi kame itendelwa
Yonyene. Kwa Yonyene kwikale ekanya mu nako
ni nako! Amen.

12

Oupilo mu Misebezi ya Nyambe

¹ Aabange, kame ni milapela cwale mu sishemo
sa Nyambe mutende etinyutu tenu esitabelo no
kuyoya, okukena niku tambulwa kwa Nyambe nji
itende okulapela kwenu no mebo.

² Mulese okukubeeka onene kweyi no litunga,
kono mufutulwe mu kumishemuna mukuyupi-
sisa kwenu nji mulemuhe esi singwa kwa Nyambe
nji sibine, esi no kuwaba nesi silumelelwa ni ku-
petahala.

³ Cwale mulibaka no sishemo sina biwi kwa
mene kame ninunga omunu yonje mwanyi
nji alese okukununeka onene okubita omu
ahupulela aakwaye, kono akuhupule wino kweyo
imulikana, omunu ni munu mu tumelo ana biwi
kwa Nyambe.

⁴ Kakuli kanyi omu twikalele ni ilama nokupula
mu lutu lumweya, mi eilama kaitende omusebezi
mumweya,

⁵ kamekulingeso ni kwaaci naba tuli ano
kupula, kame tuli esilama simweya kwa Kilesite

mi toonje kame tuna bekiwa bamweya kanyi lutu lumweya.

⁶ Cwale aba tuli ni timpo eti tishutana, okuta mu sishemo tunabiwi, tuku tusise yoo, nji niunuhi tunuhe okuta mu tumelo yetu.

⁷ Nji nisebelezo, tubeleke ngeso, nji nikwiiyeta twiiyete ngeso.

⁸ Nji nikususuweza tususweze ngeeso, woyo oba, abe yo lukuluhile, woyo otwaletela atwaletela wino, woyo otenda etikezo no makeke, atende yo wabelelwe.

Emilao no Lilato

⁹ Elilato lyuulwe okukutendela. Mutimbe ouyi, mukumalele ouwa.

¹⁰ Mu kusinge omunjili ku munjili kanyi omunu ni minaye, mi mukubeeke okumonisa okukutekana.

¹¹ Kweyi nouku kataza mulese okufokola, mutukufalelwe mu mebo, mubelekele Ombumu.

¹² Mu wabelelwe mu sepo, mukongote mu mayando mi mutundamene mu kulapela.

¹³ Mutabele aasikupumena ku inu aba aulwile, mutundamene mu kutambula agenda.

¹⁴ Mufuyole aa amiyandisa, mufuyole mi mulese okukuta.

¹⁵ Muwabelelwe nawo awabelelwa, mulile nawo alila.

¹⁶ Mutende asimucima mumweya anjili ku kwanjili, mulese oukukuumusa kono mu lumele okwikala nawo kaakwite einu, mi mulese oukumona oku shangama.

¹⁷ Mulese okuusa ouyi ku uyi, kono mutokomele okusinga eino kuwaba mu miyo no aanu onje.

¹⁸ Nji kame ku twesahala, simba mwaanyi, mu yoisane mu kozo naanu onje.

¹⁹ Asingiwa, mulese okuusa ouyi mwenyene, kono mube okutweba kwa Nyambe esibaka, kakuli kame kung'olilwe nji, “Okufaniketa ni kwange, time sani usa, kame kwamba Ombumu.”

²⁰ Cwale, “Esiila sowe aba siyombile, osibe esino kulya, nji kame sifile elinyotwa, osibe esi no kunwa, kakuli mukutenda ngeso, kame wenisa esiila sowe.”

²¹ Olese oku lumelela ouyi nji okukome, kono okome ouyi ni uwa.

13

Oku Kuteka Asikubusa

¹ Cwale omunu yonje aku beeke kunji no maata no ao asikubusa elitunga. Kakuli kakwisa amaata ao kaatundu kwa Nyambe, mi amaata no kuneneba aliko kame ana kusumiwa kwa Nyambe.

² Cwale abo woyo okana amaata aa kame akana eso sinaketiwa kwa Nyambe, mi ao atenda ngeeso kame saatuliwe.

³ Aa busisi kaacilisa kwao atenda wino, kono kwao atenda eyi nokwiiba. Nji mulese kucila woyo oli mu mubuso, Cwale mutende eyi no kuwaba mi mbamuwana okulumbiwa kwa yonyene,

⁴ woyo ni mubika wa Nyambe kuuwa wenu. Kono nji kame mutenda eyi no kwiiba mumucile, kakuli amaata aye no kubakisa nia niti, ni mubika wa Nyambe woyo omonisa okubambaba kwa Nyambe kwao asikutenda ouyi.

⁵ Abo cwale omunu kame afanena okukong'elela amaata, kono kasa feela mukucila okutweba kwa Nyambe kono kame ni mulibaka no lizwalo.

⁶ Elibaka elyo naanyi kame mutenekanga omutelo, aano mulawo kame abelekela Nyambe abo aba aiyateteta emisebezi yoo.

⁷ Mwateneke onje einu yoo, muteneke omutelo kwao ufanena, elikute kwao lifanena, mukuteke ao afanena okukutekiwa.

Emisebezi ku munu ni munu

⁸ Mulese kuteula esikoloti no munu konji oku kusinga omunjili ku munjili, kwa woyo osinga omwabaye kame aiyateteta omulawo wa Mushe.

⁹ Etitaelo eto taamba nji, “Mulese okutenda owoozwa, mulese kwiibaa, mulese kwiita, mulese okulakaza einu no akwenu” mane ni titaelo etinjili kame tikuumbele mou omulawo ou wamba nji, “Musinge ao muyakile noo kanyi omu mukusingela mwenyene.”

¹⁰ Nji kame musinga aa muyakile noo kamutwese okwaatenda ouyi, abo cwale elilato nikwiiya teteta emilao ya Mushe.

¹¹ Kame mufanena okutenda ngeeso kakuli mulimukile nji enako yakeela kale abo nji mwinguke batulo. Abo enako eyo satuyoyisiwe sebeli ili beebi bano okubita omo ina kwikalelanga baweli aba tuna kutateka oku pumena.

¹² Ousiku wata kale kule, mi cwale omunjii sebeli uli netu. Abo cwale tutundise emisebezi no uwi mi tukufuke eilwiso tuku tusinga mu liseli.

¹³ Tweende wino kanyi aanu aa ayoya mu nako no munji, kasa mukulya ouyi, simba oundalabangwana, eyi no woozwa simba eyi no uhule, simba eting'ananyi ni muna.

¹⁴ Kono mukufuke Mbumu Jesu Kilesite mi mulese okutenda etindila no lutu okwiayateteta etitakazo talo.

14

Olese Okwatula Omukowe

¹ Kanyi ku munu noku kesheba mu tumelo, atambuliwe, kono mulese okukanana naye oku kumanena ni mihupulo yaye.

² Omuu munjili kame apumena nji alye eilya yonje, abo woyo no kukesheba kame alya fela emiloho.

³ Woyo olya esilya sonje alese okunyaza woyo no kwaailya, mi woyo no kwaailya alese okwatula woyo oilya, kakuli natambuliwa kwa Nyambe ni yonyene.

⁴ Tiwe anyine nji watule omubika no mukowe? Naba sa ongole simba okukwa nitaba no molyaye. Kono mba ongola, kakuli omolyaye mbamuongota.

⁵ Omuu munjili kame aaliketa eliywaa limweya nji nilyautokwa okubita amaywaa anjili, mi omunjili omuu kame aaliketa nji onje kame alikanelela. Mulese omuu yonje atende esi akolwa wino mu muhupulo waye.

⁶ Woyo omamela eliywaa, kame alimamela mukukuteka Ombumu. Woyo olya esilya sonje, kame akuteka Ombumu, kakuli kame akutumela kwa Nyambe, mi woyo no kwaalya

eilya yonje, kame atenda mukukuteka Ombumu nuukutumela kwa Nyambe.

⁷ Kakwisa kwaaci woyo okuyoyela yonyene fela, mi kakwisa woyo okufela yonyene fela.

⁸ Cwale aba tuyoya kame tuyoyela kwa Mbumu, mi aba tufa, kame tufela kwa Mbumu. Mi cwale, aba tufa naaba tuyoya, kame tuli kwa Mbumu.

⁹ Kakuli Kilesite aba ana kufa, mi kame sebeli oyoya neli nji atende Ombumu no asikufa naa ayoya.

¹⁰ Cwale iikene aba watula omwabowe? Simba wene, iikene aba onyaza omwabowe? Kakuli toonje kame satuimekwe balubala no situlo sa Nyambe no katulo.

¹¹ Kanyi omo kung'olelwe nji,
“Luli aba ni yoya, kame kwamba Ombumu,
munu yonje kame sakubame balubala wange,
mi omunu yonje kame sa lumbeke Nyambe.”

¹² Abakulingeso, omunu yonje kame sabe ekalabo yaye kweyi anatende kwa Nyambe.

Tulese Okukwisa omunjili ku munjili

¹³ Cwale tulese okwatula akwetu kame. Kono onene muhupule nji omunu alese okubeekela omwabaye esi simukwisa, simba esi simu sitatalisa.

¹⁴ Niyii, mi kame nikolwa mwa Mbumu Jesu nji kakwisa esinu siku silafaza sonyene, kono omunu aba aaliketa esinu nji sa kusilafala, abohe esinu eso kame sisilafalile kwa yonyene.

¹⁵ Cwale nji minowe simba mukulowe kame omwenisa ba sinu eso olya, abo kwende mu lilato.

Olese okulumeleza eso olya nji sisinye omukowe woyo ana kufeliwa kwa Jesu.

¹⁶ Cwale mulese oku lumelela ouwa wenu okwambiwa nji kwiiba,

¹⁷ Kakuli omubuso wa Nyambe kasa wakulya ni kunwa kono okuluka ni kozo ni kuwabelelwa mu mebo no kukena.

¹⁸ Kakuli woyo osebeleza Kilesite kame awabelisa Nyambe mi kame alumelelwa kwaanu.

¹⁹ Abohe tu tundamene kweyi ilita ekozo, neyi satu yakisane nayo.

²⁰ Olese okusinya omusebezi wa Nyambe mulibaka no silya sowe no kwakena. Sinu sonje kame sikenine, kono ouyi ni munu aba alya esilya eso sisitatalisa omukwaye.

²¹ Ouwa ninji mulese okulya enyama simba okunwa ewaine, simba okutenda esinu eso si sitatalisa minowe.

²² Etumelo eyo oli nayo, oiteule mukaci kowe ni Nyambe. Embuyoti niya woyo nambulwa elibaka no kukwatula yonyene kweeyo analemuha.

²³ Kono woyo obilaela kame anyaziwa nji kame alya, kakulli katende mu tumelo. Kakuli esinu sonje eso sasitendiwa mu tumelo, ni sibi.

15

Muwabetwe aakwenu kasa okukuwabetwa Mwemboci

¹ Aaci no kongola mu tumelo kame tufanena okutusa nawo noku fokola oku shimba emishimbo yoo. Katufanene okuku wabetwa twemboci.

² Cwale omunjili ni munjili kwaaci awabetwe woyo ayakile naye kuuwa woo, okwaa kulisa mu tumelo yoo.

³ Kakuli simba Kilesite kasikukuwabetwa yomboci, kono kanyi omo kung'olelwe ni, “Okwangoliwa kwaa amyangolanga kwaiya kale kwa mene.”

⁴ Eyo yonje ina kung'oliwa kunyima kame ina kung'oliwa mu mukwa no kulaela aci, ni mukoongoteta ni muku susueziwa mu liywii mbatu wana esepo.

⁵ Cwale Nyambe no kongoteta ni susuwezo amibe okuyoya wino mukaci kenu omunjili ku munjili bamweya ni Kilesite Jesu,

⁶ ni bamweya ni liywi limweya mutwese oku kanyisa Nyambe yonyene sitaye Mbumu wetu Jesu Kilesite.

Amaywi no kuwaba kwao no macaba

⁷ Abo cwale mutambule omunjili ku munjili kanyi omo ana kumitambulela Kilesite mu kanya ya Nyambe.

⁸ Abo kame nimyambela ni Kilesite nakutenda omubika kwao ana kuta ku mupato oku monisa eniti ya Nyambe, okuongoteta esepiso inakubiwa kwaa shemi oo.

⁹ Mi abo ni aano macaba akanyise Nyambe ku sishemo kumusa waye, kanyi omo kung'olelwe ni,

“Abo cwale mbani lumbeke yonyene mukaci no asimacaba,

Mbaniimbi okulumbeka elitina lyowe.”

¹⁰ Mi kame nakukwambiwa ni,

“Muwabelelwe aano macaba onje naanu aye!”

¹¹ mi kame,

“Mulumbeke Mbumu, aano macaba onje,
mi mulese aanu onje amulumbeke!”

¹² mi kame okutunda abo, Isaya nakwamba nji,

“Emibisi ya Jese mbaimene,
Mbainguka okubusa aano macaba,
mi asimacaba mbaabeke esepo yoo kway-
onyene.”

¹³ Cwale Nyambe no sepo, amiiyate
okuwabelelwa mukwiyala ni kozo muku pumena
kwenu, nji cwale mulibaka no mata no Mebo no
kukena mwiyaale esepo inene.

*Elibaka lya Paulusi mukung'ola ngeeso
mukuzwafa*

¹⁴ Meene luli kame naniyupisisa kwaanyi, aa-
bange, nji anyi kame mwiyaale ouwa ni tingana
tonje mi kame mutwesa okuku laela omunjili ku
munjili.

¹⁵ Kono banako injili kame ninaku ming'olela
mukuzwafa mumukwa no kumi pulukisa,
mulibaka no sishemo sinakubiwa kwa mene
okutunda kwa Nyambe,

¹⁶ okutenda omubika wa Kilesite Jesu kwaa
no macaba mu situlo nou pulisita no Liywi no
kuwaba lya Nyambe, nji cwale etinubu no ao
asimacaba atwese oku tambuliwa ni kenisiwa ku
Mebo no kukena.

¹⁷ Mwa Kilesite Jesu, kame nikwite elibaka no
oukukuhusa ku misebezi yange kwa Nyambe.

¹⁸ Kakuli kanitamba okwingena okwamba
nambulwa eso anawana Kilesite mwa mene
muku endisa aano macaba nji akong'elele

Nyambe mulibaka lyaeyo ninaamba neyo nitenda.

¹⁹ Mu maata no timakazo ni yambo no kukomokisa, mu maata no Mebo nokukena, nji cwale okutunda ku Njelusalema mane ni kutunda musibaka soonje no Ililiko kame nina kutaza mukwiyala eliywi lya Kilesite.

²⁰ Mane ni kwiitenda etakazo yange okukutaza eliywi oko kasikulimukiwa kale Jesu, nji cwale nilese okuyaka abo ana tateke omukwange okuyaka.

²¹ Kono kanyi omo kumg'olelwe nji,
“Mbamono woyo kasi kwambeliwa kale eyaye,
mi mbaa yupisisa woyo kasi kwambeliwa
kale eyaye.”

Omulelo wa Paulusi no kupotela ku Loma

²² Eli elibaka elyo enako yonje kame nina ku kani siwangwa okwiiya kwaanyi.

²³ Kono bano kumona nji sikwite esibaka no kubelekela muno muti tolopo, mi ba myaka no kupula kame ninyolelwe okwiiya kwaanyi,

²⁴ kame nisepile nji mbani mimono aba sanibite okuta ku Sipaini, mane nji munituse mu musipili wange kuya, munyima no oku kolwesisa oku nikong'a kwenu kanyonyo.

²⁵ Kono bano kame nikatile ku Jelusalema mu musebezi waanu a Nyambe.

²⁶ Kakuli asi Mesodoniya ni Akaya naawa-belelwa okutundisa eyi no kuba kwaashebile mukaci kaanu a Nyambe ku Jelusalema.

²⁷ Kame anakuwabelwa okutenda ngeeso mi niti luli kameli ni sikoloti kwa onyene, kakuli

nji aano macaba naiyi mukukutabela kweyo no timbuyoti too no mebo, kame afanena ngeeso okwatusa mwibelekiso no timbuyoti.

²⁸ Cwale abo abasa ni mane eyi mi naaba kale eyo ina litiwa, mbaniekeze okuta mu musipili wange ku Sipanishi

²⁹ Mi ni limukile nji aba saniye kwaanyi mbani-iyi meni iyalile etimbuyoti ta Kilesite.

³⁰ Kame ni kumbela kwanyi aabange, mulibaka lya Mbumu wetu Jesu Kilesite mane ni mulibaka no lilato no Mebo, mu nilwele naanyi bamweya mu milapelo mulibaka lyange kwa Nyambe,

³¹ nji niikale wino kwao no kwa pumena mu Judeya mane nji omusebezi wange mu Njelusalema upumeniwe kwaanu a Nyambe.

³² Nji cwale mukusinga kwa Nyambe ni twese okwiya kwanyi mukuwabelelwa nji mane niye nitusiwe mukukuwana kwetu.

³³ Nyambe no kozo aikale nanyi monje. Amen

16

Okulumelisa kwange

¹ Kame ni limukisa kwaanyi mandetu Febe ondikoni mu Ndoo ya Nyambe ya Senkiliya

² nji mu mutambule mwa Mbumu kanyi aanu a Nyambe, mane nikumuba etuso yonje eyo sasaele okutunda kwaanyi, Kakuli nakwikalanga omutusi kwaanu no kupula mane ni kwamene luli.

³ Oasikupumenase Pulisika ni Akwila aakwange ni beleka noo mwa Kileste Jesu,

⁴ awo ano ku tombola omoyo woo mulibaka lyange. Kame ni kutumela onene kwa yonyene

mane kasa meene feela kono ni tikeleke tao aa no macaba tonyene.

⁵ Oasikupumenase Endoo ya Nyambe eyo ikuwanenanga mu ndoo yoo.

Oasikupumenase omusingiwa wange Epainetasi woyo neli omutamuno no weli okupumena mwa Kilesite mutolopo ya Asiya.

⁶ Oasikupumenase Maliya kame woyo ona kubeleka mukongola mukaci kenu.

⁷ Oasikupumenase Andilonikasi ni Njuniyasi aakwange ni mapanditi nina kwikalanga noo mu tolongo, ni alume no kukutekeha mukaci no atumiwa, mi kame ana kwikala kwa Kilesite oweli kwa mene.

⁸ Muasikupumenase Ampuliyatasi omusingiwa wange mwa Mbumu.

⁹ Muasikupumenase Ambanasi omwabetu mu musebezi mwa Kilesite ni musingiwa wange Sitakisi

¹⁰ Muasikupumenase Apele woyo ona lumelelwe mwa Kilesite. Muasikupumenase ao awaniwa mulusika lwa Alisitobulu

¹¹ Muasikupumenase Helondiyani omukwange Munjunda. awo awaniwa mu lusika lwa Nasiso. Muasikupumenase awo ali mwa Mbumu.

¹² Muasikupumenase Tilaifaena ni Tilaifosa, ao abeleki mwa Mbumu, muasikupumenase musingiwa no mu Pesis woyo onabeleke mu kongola mwa Mbumu.

¹³ Muasikupumenase Lufusi woyo ona ketiwa no kongola mwa Mbumu mane nainawaye naamandi.

14 Muasikupumenase Asinkilitasi Felengoni Hemusi, Patolobasi, Hemasi mane ni asingiwa ao ali noo.

15 Oasikupumenase Filolongasi ni Njuliya mane ni Neliyasi ni mandaye ni Olimpasi mane ni aanu a Nyambe onje ao ali noo.

16 Muasikupumenase omunjili ku munjili mu ukutubeta no kukena. Mi Etikeleke tonje ta Kile-site kame timi keeta.

Etitaelo no mamananeno

17 cwale abange kame ni mikumbela nji mumele ao atenda etifapano ni utata mu kulwisa etuto eyo munaiyetiwa, mwaa tokomele.

18 Kakuli aanu no ngeso kaa belekele Ombumu Kilesite kono kame abelekela amapumo oo feela, mi mu maywi ayupisa oku mamata ni kushembashemba kame akelusa emicima no awo asaela okuyupisisa.

19 Ba nako ino okupumena kwenu kame kulimukilwe kwaanu onje, kuti cwale niwabelelwe, kono kame ni singa nji mwikale aano kushangama kweyi no kuwaba mi mu tende ano kweluba kweyi no kwiiba

20 Cwale Nyambe omunyaa kozo mba colwele Satani kunji no makondo enu. Esishemo sa Mbumu wetu Jesu siikale naanyi.

21 Timoteya omukwange ni beleka naye kame amikeeta, mane ni Lusiyasi ni Njasoni, ni Sospatele akwaange ni beleka noo kame amikeeta

22 Meene Tetiyasi omung'oli no ling'olo kame ni mikeeta mwa Mbumu.

23 Ngayusi omutambuli wange nou no keleke yonje kame amikeeta. Elastasi omu babaleli no

mali no muleneng'i kame amikeeta, ni Kwatasi omwabetu kame amikeeta.

²⁴ Esishemo sa Mbumu wetu Jesu Kilesite siikale naanyi moonje. Amen.

Okumanenena emilapelo no milumbeko

²⁵ Cwale bano kwawoyo otwesa okumyongota oku kumanena ni liywi lyange ni tikutazo ta Jesu Kilesite mane niku kumanena ni sinulo no kunutu no niti eyo inakushweekiwa ba nako no kuleba nakunyima.

²⁶ Kono cwale eniti nailimukisiwa mi cwale mwaang'oli no aanuhi a Nyambe nailimukiswa kwaa simacaba onje, okwamana ni taelo ya Nyambe no nako yonje, okulita elikute no tumelo.

²⁷ Kwa Nyambe yonyene feela no kushangama, mwa Jesu Kilesite kwikale ekanya no kwaabwa! Amen

Luyana Bible Translation

Luyana: Luyana Bible Translation (New Testament) for Zambia

copyright © 2024 The Word for the World International

Language: (Luyana)

Contributor: The Word for the World Southern Africa

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-10

PDF generated using Haiola and XeLaTeX on 10 May 2025 from source files dated 10 May 2025

b071328c-adc7-5e91-a867-254a1a2a7440